

Visoki predstavnik donio Odluku o kolektivnim / tranzitnim centrima

Visoki predstavnik Paddy Ashdown u petak je donio Odluku kojom se od domaćih organa vlasti zahtijeva da poduzmu mjere kako bi se osiguralo da se svi kolektivni i tranzitni centri u Bosni i Hercegovini koriste kao alternativni i nužni smještaj.

Postoji velika potreba za takvim smještajem kako bi se ispunili uvjeti iz imovinskih zakona i zakona o raseljenim osobama i izbjeglicama. Postoji hitna potreba da se iznađe rješenje za one za koje, inače, postoji rizik da će ostati bez krova nad glavom kada napuste tuđu imovinu za koju je podnesen zahtjev za povrat. Stoga, što je moguće više objekata treba staviti na raspolaganje za rješavanje ovog pitanja, u skladu sa imovinskim zakonima. Ti zakoni ne zahtijevaju samo od vlasti na svim nivoima da osiguraju alternativni smještaj, već to zahtijevaju i od preduzeća u društvenom vlasništvu. Kao jedan od najvećih potencijalnih resursa za ovu vrstu smještaja, kolektivni centri moraju ostati otvoreni i promijeniti svoju namjenu u objekte za alternativni i nužni smještaj.

Odluka propisuje da ministarstva nadležna za ove objekte moraju sarađivati sa UNHCR-om na izradi plana za racionalizaciju raspoloživog prostora u ovim centrima. Plan će promovirati povratak ugroženih bh. izbjeglica i raseljenih osoba, koje trenutno žive u kolektivnim ili tranzitnim centrima u BiH ili susjednim zemljama a čiji imovinski zahtjevi još nisu riješeni, u svoje domove.

Prema ovom planu, od nadležnih ministarstava se zahtijeva da ponude raspoloživi prostor u kolektivnim centrima, kao alternativni smještaj, sadašnjim korisnicima potraživane

imovine u objektima unutar svoga kantona ili regije, što je moguće bliže općini gdje oni sada borave, ili, ukoliko sadašnji korisnik tako odabere, u objektu koji je što je moguće bliže općini u kojoj je imao prebivalište na dan 30. aprila 1991. godine.

Ovaj plan, uključujući i potpuni i konačni spisak izbjeglica i raseljenih osoba, će se dostaviti na uvid članovima Državne komisije za izbjeglice i raseljene osobe i Radnoj grupi za obnovu i povratak prije nego što se otpočne s njegovom provedbom. Taj spisak će sadržavati podatke o prostoru koji ove osobe trenutno koriste u objektima u kojima se nalaze, mjestu gdje se nalazi njihova potraživana imovina, raspoložive podatke o trenutnim korisnicima njihove potraživane imovine, kao i druge podatke koji su neophodni za provedbu ovog plana. Članovima Državne komisije za izbjeglice i raseljene osobe i Radnoj grupi za obnovu i povratak na uvid će se dostavljati periodični izvještaji o napretku ostvarenom u provedbi ovog plana.